



DEO OPTIMO MAX.
UNI ET TRINO,

VIRGINI DEIPARÆ, ET S. LUCÆ,
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
*manè discutienda in Scholis Medicorum, die Veneris quarto
mensis Januarii, anno Domini M. DCC. XLIII,*

M. JULIANO BUSSON,
Doctore Medico, Præside.

An ab origine Monstra?

I



QUÆ in exequendis operibus certis atque constantibus alligata videntur legibus natura, ab ipsis perrarè quasi recedens, stupefactis hominibus miranda portenta subministrat. Hæc & si tùm in iis quæ ab imis terræ visceribus extrahuntur, tùm in vegetantibus nonnunquàm cernere datur, multò vividioribus tamen oculis in animalibus lustrantur. Quæ in hocce posteriori regno contrà naturam fiunt aut apparent expendere nobis animus est. Omne animal eâ partium conformatione & dispositione donatum quæ discrepet quàm maximè ab illà quæ ipsius speciei individuis propria est monstrum habeatur. Hinc sub uno genere multiplicis speciei intelliguntur, quatenus aut per additionem aut per subtractionem, figuram situmve partium monstra constituuntur. Monstra quæ passim obvia habuere graphicè quidem delinearunt antiquiores, ast in eorum assignandis causis, quàm longè à vero aberrarunt! Testimonium præstant quotquot de ipsorum origine finxere hypotheses seu potius commenta, Naturam errasse perperàm clamitant; sed natura

Deus est quem erroris insimulare nefas. Nequè ipsos tantoperè à veritate diffitos tunc temporis quo veluti velo scientiæ obtegebantur, mirabitur quisquis re accuratius perpensa dignoscet vix aliam esse in physicis quæstionem quæ æquè ambagibus intricata, difficultatibus undique referta sit ac illa quæ impræfentiarum est. Evanescere veterum deliramenta: duplici methodo mysterium formationis monstrorum explanare aggressi sunt physici recentiores. Prioris si sis afflecta, monstra talia esse ab origine, ab ovo, fareberis; alteri si obtemperes primordialia esse monstra nequaquam existimabis, sed à causis fortuitis & ex accidenti concurrentibus talia facta fuisse opinio tibi erit indelebilis.

II.

DUPLICIS atque diversæ penitus indolis ova distinguenda esse, quorum alia animal consuetæ ordinatæque partium evolutioni aptum natum continent, alia verò inordinatæ atque portentosæ; utraque verò ab ipso summo conditore hic illic sparsa, plurimis visum & ratum est, indeque tanquam è genuino fonte hauriendam esse vel & stupendorum magis, quæ in generatione animalium apparent phenomenon enodationem. Nequè defunt quibus sententiam fulcire atque stabilire nitantur rationum momenta; vel etenim in ovo tales quales in postero in monstro spectabiles aderunt jam continentur partes, vel fortuita & occasionalis causa, quæcumque sit, evolutionem partium præpediens, monstrum ex accidenti procreat. Ast plurimis in individuis cultro anatomico subiectis & avidis oculis attentoque animo perpenis, causa hæc non modò non apparuit, sed ne quidem levissimis suis vestigiis conjecta est: à tegumentis ad penetralia intelligentiam finem liberè, media sapienter eligentem, omnipotenter opus quod libuerit perficientem universa prædicarunt: nihil casum, nihil fortunam commonstrat, imò potius ubique adoranda se prodit summi opificis ubertas eò mirabilior, quòd à vulgarioribus viis declinans, divitiis suas luculentius comprobet. Adde infaustos pluries conatus ut portentosa seu membrorum conjunctionis seu separationis, additionis, subtractionisve Mechanismus erueretur, atque firmitus adhuc evinceretur monstra talia fuisse vel ab ovo. Verum si monstrorum efformationem à causis quæ ex accidenti in obvia quæque agere possunt desumendo, expositio indè nascatur supremi artificis Jura æquè quin & plus fervans, rationi consentanea magis, mechanismum operis nudis oculis aliquando ex omni parte patefaciens, fundata in analogia, adversariorum opinionis fundamenta evertens, Physices legibus consona & accommodata, palmam sanè facilius hæc referet: ipsam autem pretiosis hisce insignibus nobilitari planum fiet ex sequentibus.

III.

SIC à naturæ fabricastum est illud organum, in quo animantium foetus increscerantur, ut mirificè causarum fortuitò impulsarum impressiones suscipere valeat, citissime ad contenta transferre. Ejus sunt indolis priora foetuum rudimenta ut flexilia admodum uniuscujusque configurationis videantur capacia. Nullum eorum latet prior veritas quibus compages & structura uteri nota sunt: nervis habità ratione molis, maximis & multiplicibus donatus, fibris instructus muscularibus, in affectibus Hystericis, animi pathematis violentioribus succutitur, contrahitur, convellitur. In ipsius cavo foetus partes evolvuntur, ampliantur, nutriuntur, usquedum carceris impatiens, superatis obicibus, fiat lucis particeps. Jam verò germina duo, prolifico semine fecundata, ad uterum pervenisse demus; quâ proportionem ipsorum evolvuntur stamina, extenditur & ipsemet. Si convelli aut à quæcumque causâ ita disponi supponamus, ut ipsius latera, ad intimiorem contactum accedendo, cavum arceant magis, contenta compriment plus quàm tunc ex instituto naturæ fieri deberet, quid evenire arbitraris? Mollia foetuum rudimenta, coalitioni aptissima, con-

jungeantur variè pro vario respectivo situ, pro variè compressionis gradu: si levior sit, externas tantùm partes adunabit, si validior, ad penetralia usquè vim suam exercere aliquandò potis erit; quot inde destructiones, deformationes, mirandæ transfigurationes, conjunctiones partium intelliguntur enasci eò facilius, quòd tunc temporis, quasi colliquescentes, levissimo impetui cedere cogantur. Et sanè quisquis bonâ fide relationem causarum cum effectibus iis, sæpè nimis agendi ipsis occasionem oblatam perpendet mirabitur forsitan magis quòd non sæpius monstra appareant, quàm quòd aliquando oculis subjiciantur. Abiit ergò ut in Deum opt. max. immediatam monstrorum productionem refundamus: generalibus opera sua regulis subdidit, è quibus, velut è fecundo sinu, quidquid singulare ac mirandum in animalium fabricâ accidit, depromere debemus.

I V.

ILLIUSquam mox summatim efformationis Monstrorum Theoriæ proponēbamus veritatem specialius indagemus atque perscrutemur. Quanquàm non ubiquè, non semper in intimis recessibus oculum digitumque ducat, naturæ agendi modos & secreta ex omni puncto non revelet, non tam ab ipsis quàm à nostrâ tenuitate repetendum erit illud incommodum. Hæc Theoriâ duce causarum accidentalium incompingendis monstrorum partibus concursum quandoquè nitidè introspiciemus, aliàs ipsarum vestigia adhuc subodorare dabitur. Egregiè quidem pro ipsâ militat quæ in plantis quotidiana experientia observat: ibi duo fructus eodem pediculo fulciti, ibi ejusdem arboris duo rami toto tractu adunati, intimiusque se se penetrantes, ibi peregrinus ramex hospiti trunco implantatus, communi vitâ cum ipso vegetans offeruntur. Nonne pressu juncti fructus & rami vasa, fibras, & trachæas sociando, mutuum commercium iniere? Si in compactis ligni partibus talis societas insitui potest, numquidne compressio in mollibus tenerisque embryonum corpusculis stupendas compagines longè facilius adaptare valebit. Duriore jamque solidescētes corporis humani partes mirandis adhuc visæ sunt obnoxie mutationibus: puer quatuor annorum natus *Hydrocephalo* laborat; ossa parietalia & occipitale futuris jamjam unita, sejunctionem ne minimam quidem sinebant: accrevēre ad molem grandioris adolescentis. Post mortem cerebrum in giris contortum non apparuit: figuram planam sphericam affectabat ipsius substantia corticalis cui parili modo & ordine substrata erat medullaris. Ventriculorum parietes eo à se distabant intervallo quod ad minùs aquæ uncias octo contineret; liquido constat quod à sola compressione factâ à fluido in ventriculis stagnante orta sint & singularis hæc cerebri evolutio & portentosa ipsius fornix accretio: quid mirum igitur si in tenellulo embryone stupendas partium explicationes efficere valeat. Descriptionem monstri quod duo sætus constitebant in omnibus ritè ordinati, atque distincti, excepto fronte quo mediante jungebantur, memoriæ tradidit *Parvus*: vel primo intuitu perspicuum est ad compressionem solummodò à quâcumque causâ deveniret, delegandam esse hujus concretionis originem; fatentur & primordiorum monstrorum defensores. Brevis terminaretur si parî negotio omnium ac istius monstrorum conformationis mechanismus exponeretur: ast plurima sunt in quibus, generales etsi causas denotare valeamus, in particularibus tamen assignandis, ipsarum actionibus eruendis, hæremus anxii: indè objectionum series, veriùs unica obiectio tot formas præ se ferens quot inextricabiles casus enarrantur.

V.

SI ab actione, inquit, harumce causarum quas inausita fortuna movet, quæque sæcò impetu feruntur, eruenda foret monstrorum origo, ipsarum agendi methodos oculos sedulo, doctè, attentè inquirentes, non fugeret: fatendum quòd etsi quandoque mirandæ compaginis mechanismum reteget hæc inquisitio, sæpiùs ta-

mèn felicem exitum non reportet; obscurioribus involuta tenebris portentosa fabrica, ab accidentium hypothefi enodari se non finens, rem à principiis, ab ovo esse repetendam firmiter astringit. Quibus tale ardidet ratiocinium de sua inquirendo sagacitate modeste satis sentire non videntur. Ergone ipsis abstrusiora arcana pandere debuit natura? Si distinctè, nitidè & evidentè mechanicas rationes monstrorum efformationis à causis accidentalibus deducere non valeant, ergone idcirco exulanda sunt hæ causæ? Quoties innotescit causa, innotescit effectus, & inter utraque concentus crassiori velo obtegatur! intermittentes febres Kinakina fugat, vomitum Antimonii regulina pars promovet, adhuc in profundo jacet illorum effectuum mechanica actio. Causarum accidentalium ipsimet imperium continentur, ubi ipsas in agendo pedetentim subsequi possunt: sed si illarum actio lucem refugiat captumque nostrum exsuperet ergone aliud ex origine aliud ex accidenti portentosum numerabis? Nequaquam; uniformi gressu procedit natura, cujus si non semper insistere vestigiis valeas, curiosius intendè, diligentius inquire; si adhuc incassum, humanam fatearis tenuitatem. Verùm non unica sed plures simul partes plures circumstantiæ debent trutinari, ut facilius indè fiat ad genuinam mirabilis concretionis originem ascensus: hoc quanquam examen speciale & concinnatam accidentium non semper actionem, summariam tamèn atquè sufficientem indigitabit. Veritatem agnoscat certius quisquis effectuum cum causâ proportionem perpendet; in monstris quid stupens contemplaris membrorum confusiones, deordinationes, translationes, uniones nocivas, functionum vitæ sanitati, speciei propagationi necessariorum abolitiones, depravationes? Numquid summè sapientis, summè potentis artificis adeò ridicula adeò manca opera digna forent? Causarum accidentalium caractèrè obsignantur, quæ ordinis & consilii nesciæ, in obvia quæque cæcò modo agunt,

Non ergò ab origine monstra.

DOMINI DOCTORES DISPUTATURI.

M. Theodorus Baron.

M. Leander Peages.

*M. Joannes-Baptista du Bois,
Professor Regius.*

*M. Andreas Cantwel, è Regiâ
Scientiarum Societate Londonensi.*

*M. Ludovicus - Alexander
Vieillard, Pharmacia Professor designatus.*

*M. Guillelmus - Josephus de
l'Epine.*

*M. Benjamin Ludovicus Lucas
de Laurembert.*

*M. Ludovicus Guillelmus le
Monnier.*

*M. Ludovicus - Hyeronimus
Cognier, Rei herbaria Professor.*

Proponebat Parisiis, PETRUS - ISAAC POISSONNIER, Divionæus, Salyberrimæ Facultatis Medicinæ Parisiensis Baccalaureus,
A. R. S. H. 1743, à sextâ ad meridiem.